



Anwar bersama Dr Wan Azizah berbual dengan Gobind ketika mengunjungi kediaman Menteri Digital yang turut disertai Ahmad Zahid, Saifuddin dan Loke sempena Deepavali, semalam. (Foto ihsan PMO)

Rai Deepavali dengan semangat kekitaan

Anwar ajak rakyat teruskan sikap saling menghormati demi suburkan perpaduan

Oleh Latifah Arifin
latifah@bh.com.my

Kuala Lumpur: Perdana Menteri mahu rakyat Malaysia sama-sama memanfaatkan perayaan Deepavali untuk menyemai perpaduan dan memperteguh semangat kekitaan dalam kalangan masyarakat yang berbilang kaum di negara ini.

Datuk Seri Anwar Ibrahim berkata, ia selari dengan semangat Pesta Cahaya yang penuh keceriaan dan menjadi lambang kemenangan cahaya mengatasi kegelapan, kebaikan menundukkan kejahatan serta kekuatan ilmu mengatasi kejahilan.

“Sebagai bangsa yang kaya dengan kepelbagaian budaya dan kepercayaan, mari kita terus memupuk semangat saling menghormati dan memperkukuh persefahaman antara satu sama lain.

“Gunakan kesempatan ini untuk menyemai perpaduan, menyantuni mereka yang memerlukan dan memperteguhkan semangat kekitaan yang menjadi asas kekuatan negara,” katanya menerusi perkongsian di Facebook, semalam.

Anwar berharap Deepavali kali ini diraikan dengan jiwa penuh kesyukuran dan semangat kebangkitan pemikiran yang segar.

Ini katanya, bagi memastikan agar darjat serta harakat rakyat

terus terbina ke arah menuju Malaysia yang lebih harmoni dan sejahtera.

Sempena sambutan Deepavali semalam, Perdana Menteri dan isteri, Datuk Seri Dr Wan Azizah Wan Ismail, bersama Timbalan Perdana Menteri, Datuk Seri Dr Ahmad Zahid Hamidi, meluangkan masa berkunjung ke kediaman Menteri Digital, Gobind Singh Deo.

Turut bersama dalam kunjungan itu ialah Menteri Dalam Negeri, Datuk Seri Saifuddin Nasion Ismail dan Menteri Pengangkutan, Anthony Loke.

Aset paling berharga

Gobind yang turut berkongsi kehadiran Perdana Menteri bersama rakan dalam Kabinet ke kediamannya menerusi Facebook, menyifatkan perpaduan adalah aset paling berharga bagi masyarakat dan rakyat Malaysia.

“Ia membawa kita semua bersama dalam keamanan dan keharmonian, walaupun kita berbeza bangsa, agama dan budaya. Hari ini, saya berpeluang berkongsi semangat perayaan Deepavali. Kami bertukar cerita dan berkongsi gelak tawa sambil menikmati pelbagai hidangan istimewa yang disediakan untuk Pesta Cahaya.

“Kerajaan MADANI memandang tinggi semangat ‘muhibah’ yang tidak ternilai ini, selaras aspirasi Malaysia MADANI, yang menjunjung tinggi nilai kemanusiaan, keadilan dan kesejahteraan sebagai asas untuk masa depan yang lebih cerah untuk semua rakyat Malaysia.

“Mengambil inspirasi daripada falsafah Deepavali, yang meraikan kejayaan cahaya mengatasi kegelapan, semoga Malaysia terus makmur dan maju untuk kita semua,” katanya.